

~ Fa'aaliga ~

Tusi i le Faatonu, Faamalo atu i le tou faasoa i le lipoti a le Ofisa o Sulufa'iga i aia tatau a tina ma i latou e aafiagofie. O a'u le isi tina na aafia tonu i lenei mataupu, ma ou te lagolagoina soo se mea e foia ai lenei faafitauli i o tatou nuu ma le atunuu. Faafetai lava. LFA

Faamalo atu ia i latou na faaulu mai a latou tala i le tatou tauvaga. O le a fai i ai le filifiliga mo tulaga lautogia, ona logo atu lea i se taimi lata mai.

E te maua se kopi o lomiga tuai ua uma ona toe faasa'osa'oina lelei, i luga o le tatou upega, www.ola888.com

Fakakoloa Aotearoa 'aki'a faiva 'a e Tonga

Fa'a'oaina o Aotearoa Niu Sila i tomai fa'atufugaga fa'a-Toga

Ua faaiuina i le manuia le Vaiaso o le Gagana Toga. O lana manulauti i lenei tausaga o tomai faatufugaga a ona tagata i le mamanuina ma le gaosiga o a latou measina e aliali ai o latou agavaa o ni mataisau foafoa. O le faamoemoe ia faasoa atu i le lautele o Niu Sila nei tomai anagata.

Ata: Se uso tamaitai Toga i o laua laei faalenuu moni, Nancy ma Ilaisaane Sinai Takulua, i le Vaiaso o le Gagana. E a'o'oga i Sutton Park, i Magele.



Fia iloa e Niu Sila alolofa le toa o upu a le palemia

Manatua le avaavau a le palemia o Niu Sila i le maota i le tasi aso, e lau le pala'ai o le ta'ita'i o le Itu Agai. Ioe, e faatu tonu lava le inainā i le mataupu ia Suria, ma le tatau ona o a tatou fitafita i le taua: Mafuaaga? E tetee atu i le leaga ma lavea'iina i latou o loo mafatia!

O loo fia iloa nei e Niu Sila pe moni le toa o upu a le palemia i lenei aso, e ala lea i lona suia o le tulafono, e mafai ai ona sii le kuota a le malo o tagata sulufa'i e faaulufale mai i totonu. I le taimi nei e 750, ae manatu isi ua tatau loa ona faaluaina.

Ua tuua'iina le palemia i le faatuatuai ona fai se tonu a o loo aga'i ina tuga mafatiaga o le lalolagi puapuagatia.

Ua tali atu isi ta'ita'i i le lu'i. Muamua le ta'ita'i Siamani o Merkel, ua ofoina eleele o Siamani e ulufale atu i ai le ausulufa'i. E faapea foi Peretania i lana palemia o David Cameron, ua folafola lona taliaina o se vaega i totonu o lona atunuu.

Samaria Aga-lelei: Merkel, ta'ita'i Siamani, pele a tagata sulufa'i; John Key o Niu Sila, tuua'iina; ma le ata o Aylan Kurdi, 3, fafaguina le lalolagi i le mea o loo tupu, ma le fesili o augatausaga, i soo se tasi, O ai lo'u tuaoi?



O loo tulaga 90 Niu Sila i le lisi o malo e talia tagata sulufa'i. E mafua ai le taofi o nisi, e maulalo tele lona sao i lea galuega lavea'i.

E manatu le palemia o loo tala-feagai le fesoasoani a Niu Sila, ae ese foi le taofi o le Itu Agai ma se vaega feoloolo o le mamalu lautele.

Ua sauni nei le Leipia e faaofi se tulafono i totonu o le maota e auala ai se fesoasoani faanatinati. Ua faaalai foi le agaga fia fesoasoani o le to'atele, o nisi ua faailoa lo latou

sauni e faaulufale le aumafatia i o latou fale o ni malo, pe a to'ai taunuu.

O le vaiaso ua mavae na maimoa ai le lalolagi i le ata o le tama sulufa'i o Aylan Kurdi, 3 tausaga, na malemo ma tafea a'e i se matafaga o Take, ina ua goto le vaa ma feoti ai ma lona uso ma lo laua tina. Ua avea nei le ata ma se faatusa e faailoa i le lalolagi lenei mafatiaga tutasi.

Ua lata i se 3000 le aofa'i ua maliliu i lenei esoto o le seneturi, a o tau saili se mapusaga i nuu ese, ona o sauaga o taua ma fevaevae'iga i o latou nuu moni.

Ripoti o le Vaiaso:

Aafia faia'oga ma a'oga a Niu Sila i le faaaliga o faamau faalilolilo a le Ashley Madison

Afai na e faafofoga muamua i se tala e ta'ua ai le igoa o Ashley Madison, o lona uiga ua e silafia le auga o lenei lipoti, ae afai e leai, atonu e aoga se faamatalaga e te silafia ai.

Muamua, o le Ashley Madison o le igoa o se upega tafailagi e nafa ma se fe'au e ese foi lona uiga ma le sini.

O lenei tautua e mo le vasega matutua ua manatu e saili se isi paga i tua atu o le paga masani (to'alua faaipoipo), e aunoa ma le iloina e le to'alua atoa foi ma le lalolagi.

O le Ashley Madison o lo latou ala lena i malo, o ia lea e faia fesoota'iga uma, ma teumau foi faamatalaga ma'ale'ale na o oe e tatau ona iloina. E ui ina mamao i Kanata lona ofisa tutotonu ae ua mafai ona soo ai le lalolagi i lana tautua, e faitau afe i latou o loo fa'aaogaina, e lavea ai foi ma Niu Sila.

O le ki atoa o lenei tautua o le talitonuga e malu puipuia ou faamatalaga, talu ai le tulaga ese foi o lana tautua ma lona taua i ana tagata faatau.


Ae pei ona silafia ua leai se mea o toe malu i le aulotemea (hackers), na mafai e nisi o latou ona laga i luga le muli'ato ma faaaliga ai mea sa popole i ai le 'aufaatau.

I se su'esu'ega a le Herald on Sunday na faaaliga ai e tusa ma se 65 ni a'oga ua aafia, ae pe tusa ma se 70,000 le aofa'i o ni suafa o tagata Niu Sila ua masalomia ni sootaga ma le upega.

I a'oga e 65 a Niu Sila, e 77 ni tuatusi (email) o loo aafia ai.

I le su'esu'ega a le Herald ua ta'ua ai le sootaga o le upega ma nisi o tautua taualoa a le atunuu e pei o le galuega faaloia, leoleo, soifua maloloina, ma le vao tautua faalemalo.

Na fa'aalia se popolega o taiulu o faalapopotoga taua'oga i le tele o tuatusi e ta'u ai a'oga. Na valaau Lorraine Kerr, peresetene o le Asosi a Tausimea o A'oga i ona sui o le tatau ona su'esu'eina vave le tulaga o a'oga ta'itasi ma ni sootaga i lenei upega.



Aua e te pisa: upega a le Ashley Madison, ua faamaonia nei e lata i se 5000 ana sui faatau e i lalo ifo o le 18 tausaga le matutua—tama faatasi ma teine.

Faaalia foi le popole o le matagaluega o a'oga i lenei tulaga, ae na latou faamanino o lenei mataupu e fitoi tonu lava i le komiti faafoe a le a'oga o loo aafia.

O le popolega e pei ona aliali mai, o le fa'aaoga lea o tuatusi o isi tagata e isi e tatala ai sootaga ma le upega ua ta'ua. E le gata i lena a o le avanoa e maua ai faamau ma'ale'ale e pei o numera o tusitupe ma inivesi e mafai ona fa'aaoga e le augaoi.

I Kanata e lua ni tagi ua faatau atu nei i le faamasinoga e tusa ma se \$578 miliona le aofa'i, e faasaga lea i le pulega a le Ashley Madison. O tuua'iga e aofia ai le solia o le maliega, e ta'utino ai le malu o faamatalaga o le aufaatau i lalo o lana puipuiga.

E mata'utia ni aafiaga ma ni afaina ua tula'i mai ona o le mea ua tupu, auā e le na o ni tagata faatau se 32 miliona a se upega o loo talanoa i ai, a o le saogalemu o faalapopotoga ma malo e a latou nei tagata faigaluega.

Faaigoa e se tasi o le aso o le tupu mo le augaoi a le lalolagi i mea tau faamatalaga, e aofia i lenei le faitau miliona o igoa, tuatusi fesoota'i i ona auiliiliga, numera o tusitupe, talatupe ma numera faalilolilo ua folasia i malae.

O le Ashley Madison, o se tautua e taula'i tonu lava i e aafia gofie i ia lagona o le soifuaga masani, poo ni mana'oga foi e le masani ona ta'uta'ua pe talanoaina. E ui o ni pisinisi e fitoi tonu i le tagata lava ia, a ua faamaonia nei le le toe malu pe a tuu i isi latou te faafoeina. O lana moto i le leo Peretania, Life is too short— have an affair.

E mautinoa o le a tele nisi auiliiliga o lenei lipoti e faaaliga mo aafiaga o Niu Sila lava ia.

OTOOTOGA

Natia le moni atoatoa

Ua tuua'iina le malo i le natia o faamatalaga moni e faatatau i le tulaga o falea'oga o loo ua afaina i le tutulu ma tulaga faapena.

Na o le 16 a'oga ua mafai ona faalauiloaina igoa, a o loo taofia pea e le malo igoa o isi, o se mea o loo tetee i ai ni pulea'oga ae faapea foi le Itu Agai.

I le tala faatatau o le tupe o le 2013 na ta'ua ai le 30, a o lea ua vavala mai le mea tonu, e lata lava i se 60 a'oga o loo aafia.

O lea faaaliga na auala mai i se saunoaga a le minisita o tupe, Bill English, na ia ta'utino ai i le aufai lipoti le numera 60.

Aisea ua nana ai? Ina ia faasao mai minisita i fita o popolega i le tuufesili a le Itu Agai ma le aufaasalalau tala, ta'utino le NZ Herald.

Mana'omia se faatoesega

E mana'omia vave e fanau a'oga Maori o ananafi se faatoesega mai le malo ona o agasala sa faia i na fatia ua sola. O le valaau lea mai le alii Maori sa faipule, Dover Samuels, o ia sa aafia tonu i lenei mataupu.

Ta'utino Samuels, e to'atele fanau Maori na sauaina i na aso ona o lo latou soli o le tulafono, e sa le tautala i le gagana Maori i totonu o lotoa ma potua'oga. Na vaai tino o ia i le faatinoga o sauaga, le tafetotoi o ona lava manu'a ma ila e fai ma molimau ola.

E manatu Samuels e le lava suiga lelei ua faia nei e ufiufi ai manu'a i totonu o loo nonofo ma le to'atele e pei o ia. E tatau i le palemia ma le malo ona aumai se faatoesega i se leo aloa'ia, a o faafofoga le atunuu.

Faasoa o le Vaiaaso:

Lipoti o le tulaga o aia tatau a tagata Samoa

I le so’oga o lenei faasoa ua manatu ai e taula’i i le fanau se vaaiga. E lavea fanau i le vaega o e ua ta’u e le Lipoti o le au Aafiagofie. E fa ni vaega taua e aofa’ia ai ni manatu: 1. Faatonuga 2. A’oga 3. Avanoa i galuega, ma lona 4. Sauaga i fanau o mea lē ta’ua.

Muamua le Faatonuga. Fai mai Samoa o tama a tagata e fafaga i upu ma tala. E faamaonia ai le tulaga tutotonu o le A’oa’o ma A’oa’i o fanau i le tatou Aganuu.

O loo finau nisi e le se tu a Samoa le faatonu o fanau i le sasa. O sea faiga na aumai e misionare e ala i taofi a Eperu anamua. Poo le fea le sa’o ae mautinoa ua maua’a le sasa o se auala e faatonu ai fanau.

Faatasi ma le sasa le upu faatiga atoa le fetuu. O ni auala ua iloa le le aoga mo fanau i nei aso, ua mafua ai ona pule nisi talavou i o latou ola.

E afifi i le upu Faatonuga le manatu o le faaSamoa moni lea, e fue i laau, fetogi i maa ma faifai i upu. E mafua ai le taofi e leai ni aia tatau a le Fanau. E mafua ai le popolega afai e taulagi aia tatau a fanau o lona uiga ua le toe kea mai. Peita’i e le o toe faigata ona iloa le le lavatia e na auala ona faatonutonu le olaga o suiga ma lagona e mafua mai ai. I nei aso ua taumafai e fausia fāiā a matua ma fanau i ala o le alofa ma le femalamalama’i. Ua taumafai e gaua’ia le fanau i le upu o le potu ma le filemu ae le o aga o sauaga.

O le taua lea o le faatula’i mai o le Lipoti, e faamanatu i matua ua sui le taimi, ua tatau fo’i ona sui faavae ma faiga o loo tautu pea i ai.

Lua, A’oga. E lata i se ’afa o le faitau aofa’i o Samoa o le autalavou, 19 tausaga i lalo, aofia ai le 38.3 pasene ei lalo ifo o le 14 tausaga. Molimau le Lipoti i faafitauli mua o loo feagai ma fanau i lenei lava taimi. Muamua, le faateleina pea o i latou e faamaamulu mai a’oa’oga. E ui i faamanatu a le Matagaluega o A’oga, ae e le o soona suia ai sea

tulaga. E tele mafua’aga e faamatalaina ai, aofia ai le le ’a’u o le faasoa tauseleni mo tau masani e iai pasese, mea’ai ma ofu a’oga.

O loo numi ai i ina le fesaua’iga o aia tatau ma o latou puipuiga. O fea le so’oga o le tulafono a le malo ma le aule mafai e matua ona faatupe totogi o pili, togiga, pasese ma tau uma na? A o ai na te puipuia ma una’ia? E le faigofie se tali pe afai e utiuti avanoa i alamanuia e faatino ai—muamua le malo, lua o aiga. I le taimi nei e to’atele fanau o loo fa’aa’o’oga atu e o latou aiga i Niu Sila.

O le avanoa i galuega o le tasi mataupu o loo laualuga i mana’oga o talavou a Samoa, e pei ona molimau le Lipoti. E le lava avanoa o galuega e tua i ai fanau ua iu mai i a’oga. E moni e tele fanua, a o a ni avanoa tauatina’e e faatosina ai latou e galueaiina, ma maua ai ni taui lelei e pei o galuega masani i Apia? Pau le avanoa ua iloa e nisi o le faatauoloa—le ituaiga fou o faatauoloa—e te fesavaliala’i ma faatau au oloa i le auala. Pe fiti se laki i le tau apu poo le se’i masani mo Niu Sila.

Ona oo mai lea o le talanoaga a le Lipoti i le tulaga i sauaga o le fa’aaoga sese o fanau, e aofia ai faiga aiga fai faamalosi e toe toto ai i fanau na ifo mai i le manava. E lava molimau o lipoti o mea tutupu e faailoa ai le sasao a’e o nei soligatulafono e lei masani ai. Meamanu tautua faapitoa ua toomaga i ai se vaega. A ua na o se tausima’i ae le o se foma’i o le gasegase.

O se Lipoti taua lenei, aemaise lava o lona tapenaina i le gagana Samoa, auā o le a mafai ai ona faitauina e le to’atele ma manino ai i lona taua tele.

Talosia e lomia e le Ofisa o Sulufa’iga ni kopi se tele mo le mamalu lautele.

Talosia foi e apoina e ekalesia ma faailoa atili aia tatau a fanau i avanoa taualoa o le ola, o se tasi fe’au taua i le faasoa a nuu Kerisiano i nei aso.

“mafaufauga o le vaiaaso”

“O ai foi le tagata ma te tuaoi?”

fesili a se loia lutaia ia Iesu. Luka 10 f.29

Tulimanu o Popa:

**Falea’oga mu,
faia’oga le
to’e’e ma
popolega tau
a’oga o Carmel**



Taeao manuia i le mamalu o le aufaitau, ae mua ia mua o le alofa o le Atua, ae alo maia, o nai tala foi nei o mea sa tutupu i lenei vaiaaso a’oga.

Muamua lava le faamalo i le au malosia a Otahuhu lea ua na umia le siamupini o le Liki a kolisi 2015. E le itiiti foi le faamalo ia Sagato Paulo i lana finau, malo aupito tatou uma.

O le mu o se tasi falea’oga i Waikato o loo masalomia ai ni fanau a’oga. E toe faamanatu mai ai le lu’i a le ta’ita’i leoleo, Tinā, o e iloa le mea o iai lau tama? Tamā, o e fesili poo fea lou atalii ua leva le afiafi?

Ua ta’utino se alii sa faia’oga, Rafe Fannin, i ona moliaga. Sa galue i le a’oga a tama o le Kalama i Aukilani. Na ia gaoi ni faamatalaga mai ana uo faigaluega e gaoi ai se tinoitupe e \$67,000. Ua faamalolo nei e faatali le lauina o lona iuga ia Oketopa. Maeu le fai uo o lea alii, ailoga o se kiui mao’i.

Talanoa i le mana’o tele, ua faaalua se taofi o Carmel Sepuloni i le tulaga o loo tula’i mai i a’oga a Aukilani, e maillei atu ai e a’oga tutotonu fanau mai saute ma sisifo e faatumu ai a latou lola ma taofia ai le numera o tupe maua mai le malo. O le fai’ai lava ma le atigi ipu.

Ae a le tama a’oga lea na pu’eina le ata o le faia’oga i lana telefoni ma faae’e i luga o le talitali (faaSamoa a Pole o le social media) e matamata ai le lalolagi? O se ata o le faia’oga a o tutula’i ae le iloa le telefoni i lalo. Ua maeu lava le sosopo o lenei alii.

Ma le tala faanoanoa o le vaiaaso, Si tamasii Toga o Adrian na usu atu ma lana tauvala i le a’oga ae toe tuli e le faia’oga e fai lelei mai sona ofu a’oga. O lenei faia’oga o le a ave i ai le igoa, o le Fili o Tamaiti, e nofolua laua ma Satani. Aua ne’i soso i ai se tamaitiiti ne’i pisia i lona leaga. Pei o le tala a Tagaloa David Lange, ‘e lagona mamao atu lava i o’ le namuasua o le faailogalanu. A ia manuia le vaiaaso.

O se tala lenei a le fanau mo tamā Samoa uma i lo latou aso faailogaina

O le tamaloa ma lona atalii ma le la asini



Sa iai se tamā faifa'atoaga ma lona aiga sa nonofo i uta i le togavao. O le tama, le tina ma le atalii. E telē le latou fa'atoaga o meleni, maukeni, pateta ma kapisu. E fai foi a latou meafafaga.

Ua o'o i le tasi aso ona fai atu lea o le tamaloa i lona atalii, "Alu e aumai le asini la e ta'a i le fanua. E tatau ona ta o i le aai e fai mai se tatou fa'atau a o lei oo mai le taumalulu."

Ona alu lea o le atalii ua ta'ita'i mai le asini. Ua fai e le tamaloa lona fa'agutu, ona tu'u lea i luga o lona tua se pea taga. O le pea taga lea e tu'u ai i totonu le la fa'atau pe a uma ona fai.

"Sau loa ta o ne'i tuai," o le valaau lea a le tamaloa i lona atalii.

Ua alu loa le solo i le aai, o le asini e pito i luma, o le atalii e pito atu i ai, ma le tamaloa e mulimuli mai tua.

E le'i leva lava ae fetau ma ni tamaiti a'oga o lo'o savavali mai. Na iloa mai e tamaiti le solo ona taliē lea. Na fa'apea le tala a le isi tama, "Se'i va'ai fo'i la i le solo lale e sau. Ai e le fia ti'eti'e le tamaloa i le asini."

Ae fa'apea a le isi tama, "Ailoga e iloa e le tamaloa ti'eti'e!"

Ua taliē tamaiti ma o, a o le tamaloa ua ita, auā na ia lagona lelei atu le talanoaga a tamaiti. E le sa'o lea tala, faapea o ia e le iloa ti'eti'e. Ona fa'apea lea o si ana upu i lona atalii, "Tamaiti valea!" ma oso loa o ia i luga o le papatua o le asini.

E fetau le oso a le tamaloa ma le papa o fana.

"Isa laia," o le to'u lea a le asini.

O le solo a fitafita o lo'o ti'eti'e mai ia latou solofanua ma faapapa a latou fana i luga. Ua iloa mai e fitafita le solo o lo'o aga'i atu ona tutu lea ma tilotilo mai i ai. Ua 'ata le ta'ita'i fitafita ma fa'apea lana upu i lana vaega, "O anafea na tou savavali ai ae ou ti'eti'e na o a'u i la'u solofanua. Oka se le alofa o lenei tamā i lona atalii."

Ae fa'apea mai le isi ta'ita'i, "Ailoga o sona atalii. Ituaiga foi ia e le alolofa."

Ona o lava lea o fitafita ma taliē, a o le tamaloa ua ita lava. Fa'apea lana



tomumu, "Fitafita valea!" ma oso loa i lalo ma tago atu i le si'i lona atalii i luga o le asini, ae savali ia.

"Lena la ua sa'o" o le mapuea lea a le asini.

Ua toe fa'aauau le malaga, ma e lei leva lava ae va'aia loa se solo a ni fafine se to'alua o lo'o ti'eti'e mai ia latou fo'i asini, fa'atasi ma ni tamaiti e savavali mai i tua.

"Talofa lau susuga, a fa'apefea lena malaga?" o le fa'atalofa mai lea a fafine e to'alua.

"E tusa i le fa'afesili, ma te fia o atu ma si o'u atalii i le aai e fai mai sa ma fa'atau."

Ua tutu fafine ma tilotilo i le atalii o lo'o fa'agaulua i luga o le asini. Ona fa'apea mai lea le tala a le isi, "Oi, pe ma'i ea si ou atalii?" Ae oso mai le isi fafine, "Ua atili ai le ma'i i le ti'eti'e ae le fa'ata'ita'i ona savali."

Ona o lava lea o fafine ma tamaiti ma talanoa i le fai fa'apepe o tamaiti.

A o le atalii ua ita. Ua oso nei i lalo ua tatu ona vae ma avaavau i lona tamā, "Ou te le ma'i! Ou te le ma'i! Ou te le toe fia ti'eti'e i se asini sese'u." Ae oso mai le asini, "Lelei lena, oso i lalo e savali." Ae fa'apea a le musumusu a le tamaloa, "Fafine vālea, e le iloa lava e latou ni mea!"

Ona fa'apea lea o le manatu o le tamaloa, o le a sili ona ti'eti'e uma i luga o le asini, atonu e le toe faitio mai ai se isi. Ona feosofi lea o le tamaloa ma lona atalii i luga o le asini, a o le asini ua faa'u'u lava ma faapea lana tomumu, "Pei a ua sese sia tatou mea."

Ua o'o nei i le aai ma fai loa la la fa'atau. Ua teu loa le fa'atau i totonu o pea taga, ua fa'ainu fo'i le la asini ma sauni loa e toe fo'i i lo latou aiga.

E le'i leva ona te'a ese ma le aai

ae toe fetau ma tamaiti ia sa latou fetau muamua. Ua fepasia'i ae fa'apea loa le tala a le tasi, "Ua iloa e le tamaloa ti'eti'e." Ae tali le isi, "E le iloa pe na a'o e lona atalii." "Pe na a'o fo'i e le asini," tulitatao mai le isi." Ua toē leotetele.

Ua toe tiga fo'i le loto o le tamaloa ma fa'apea lana tala, "Tamaiti valea!" A o le asini ua tau omiomi i lalo lana 'ata.

E le'i leva ae toe fetau ma le solo a fitafita. Ua fepasia'i fo'i ae fa'apea a le tala a le ta'ita'i fitafita, "Le la tonu la ua sa'o! Pau la'u pona, e laitiiti le asini ae lapopo'a le aualii, manaia pe 'ana o se solofanua." Ae fa'apea ane lana uo ta'ita'i, "Ia, avane le solofanua taugata ma le la asini ma'i. O loo tele le mau asini malolosi."

Ua li le asini ma palauvale i le lagi i le ita, ae faapea si upu a le tamaloa, "Fitafita valea, maumau tupe a le malo."

Ua fa'aauau pea le malaga, ae toe vaaia loa le solo a fafine ma tamaiti ua toe fo'i mai. Ua tutu fo'i ma fa'atalofa. Ona fa'apea mai lea o le tala a le isi fafine, "Ua a mai le ma'i o lou atalii?" E le'i toe fa'atali le atalii, ua oso loa i lalo, ua mau i le vae o le fafine ma u ma toso i lalo. E toso lava ma tauvala'au, "Ou te le ma'i! Ou te le ma'i!"

O le taimi foi lea na papa ai fana a fitafita, ua tete'i ai asini ma tu'ufeoso.

Na pa'ū ifo le fafine muamua ma faō i luga o palapala, a o le isi fafine ua lelea ifo saofa'i i luga o le isi tamaitiiti, ae alu a'e le fele o lona ofu toso ua pulou ai le toeaina ua pa'ū fo'i ia. O le taimi lava lea na tamomo'e mai ai pua'a a le aai ma lopala fa'atasi ma i latou uma. O le fanua lea e lopala ai pua'a pe a timuga.

Tamā, a e taumafai e fa'amalie uma tagata, e uma ane e leai ma se tasi e malie. Lua, o le masani lava ia faale soifuaga o le faitio—lelei pe leaga (leaga e faatusa i le lopala i isi gagana poo le faifaiupu ma sagolegole i masei ma leaga o isi ona o mafuaaga leaga), ae aua le fiu ai fua i au fuafuaga lelei e fia fai mo aiga, nuu ma soo se tautua. O le mea lea e le tatau ai ona e amana'ia fua le asini lopala. Manuia tele tamā.



Sponsored by Evaleon Books

LOUTALA FA'ASOLOPITO SAMOA HISTORY

"Ne'i mea ane na galo"



06—12 Setema

06

1984 Talanoa Samoa e lua mataupu i le tuufaatasi

07

2009 Sui i le agavale itu e feoai ai taavale i Samoa

1866 Faamau e le a'oa'o LMS Ta'uga faailoga o le sasao a'e o le mauga mu tatanu gatai o Olosega. Tolu vaiaso o sasao, ae pa a'e i luga i le aso 13

08

1979 Ulua'i taaloga (pii) a Pita Maivia, i Apia, malo ia Harley Race

1857 Taunuu misionare Matini Taiseni (Uesiliana) i Manono

10

2011 Mae'a taaloga Pasefika i Noumea. 72 pine a Samoa

2009 Talimalo Samoa i le taamilosaga Kilikiti (ICC) Ipu AsiaSasa'e-Pasefika

1911 Mapu gaoiga a le mauga mu Matavanu

11

1914 Ave faapagota tagata Siamani i Niu Sila

12

1995 Faamanatu 150 tausaga Lotu Katoliko i Samoa

1971 Faalauiloa ia Samoa le Fono a Ekalesia i Samoa i se sauniga i Ti'afau

1931 Ulua'i taaloga a Frank Solomon mo le Olopeleki, 25 tausaga, Eden Park



1927 Tofia se komisi e su'esu'eina faitioga i pulega a Risatisone

1858 Taunuu i Apia le HMS Cordelia. Ta'ita'i'au kapeteni o Vernon na ia tauanau Malietoa Moli e avane se matai Palauli na ia fasioti se faioloa Peretania, William Fox i le 1856. luga: na faalava'au o ia i luga o le vaa e tau i ai

O le faalavelave na suia Amerika

I nisi taimi e lava le ata na te faamatala le moni ma le atoaga o le mea na tupu.

Ua sefulufa tausaga i le vaiaso lenei talu ina osofa'ia Amerika e Al Qaeda, iloa gofie i le ta'u 9/11 (Setema 11, 2001).



E fa ni vaalele laupasese na latou pu'eina faamalosi ma fa'aaoga o ni auupega e faataunuu ai a latou fuafuaga faamata'u. E lua vaalele na aga'i atu i Niu loka ma sunu'i tonu fale maua-luluga e lua i le moa o lea taulaga. O le 'Olo Masaga (Twin Towers) sa fai ma ofisa tutotonu o fefaataua'iga a le lalolagi. O le vaalele lona tolu na aga'i i Uosigitone e osofa'i le ofisa tutotonu o le Puipuiga a le malo Amerika, ma faaleagaina ai se itu o le fale. O le isi na faamoemoe e osofa'i le Fale Pa'epa'e o loo alaala ai le peresetene, peita'i na lei taunuu lea fuafuaga ina ua faalavelaveina e nisi o le pasese. E lata i le 3000 i latou na maliliu. Ma amata ai loa le taua a Amerika faasaga i le Al-Qaeda. Na faato'a maua lo latou ta'ita'i, Osama bin Laden ia Me, 2011, ma fasiotia ai i se fale na lafi ai, i le malo o Pakisitana.

E maua luga se pasene o le faitau aofa'i o Amerika e talitonu ua faavaivaiina le tamaoaiga o le atunuu ona o taua faasaga i le Al-Qaeda ma malo lagolagoina. Lea fo'i ua tula'i mai le faafitauli faa-Suria ma o se faaopopo lena i le avega. E moni lava le mau ua sui Amerika, ua lata tele mai ma iloga fo'i le mata'utia o le fili fou ma ana auala o loo tau mai ai—e le faailogaina se tasi. Ae le ta'ua ona fili faalelotoifale, e aofia ai le ma'ale'ale o le va fealoa'i o ona tagata ona o le malosia o le faailogalanu o le lanu pa'epa'e.

Niu Sila: 06 Set 1948, ofo i tagata o Niu Sila la latou lava sitiseni ese mai lena a Peretania; 12 Set 1981. Feto'ai Niu Sila ma leoleo i le malaga ta'alo Springboks, ona o faiga faailogalanu a lea malo.

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com



Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.

Sponsors:

New Zealand Lottery Commission

Evaleon Books & Niupac Publishing

Wheeler's Books (NZ)



Sini Autu: Ia sa'o faaleoga o a'u upu e
e foliga tutusa

Alaga'oa e a'oa'o ai: siata upu
(upu fa'aaoga soo)

Fa'aleo manino:

1. maua māua mā'ua

2. malo mālō mālō

3. mama māmā māmā

4. saua sāua sāuā

5. tata tātā tātā

6. tutu tūtū tūtū

Aofa'i o a'u upu na sa'o =

Fale Fauupu:

O meafaigaluega e
lagolago ai galuega
faatino:

O la'u lisi o upu ou te iloa:

O ni fesili:

1. Pe na sa'o lelei le
faaleoga o a'u upu?

2. Pe na sa'o lelei la'u
faaleoga o le vauei
muamua?

3. O a ni isi upu
masani ou te iloa lelei
o latou faaleoga?

UILI FAU UPU

Saili tali o fesili o lo’o i lalo.
Pule oe pe sipela i luma
(clockwise) po’o tua
(anticlockwise).
E sa le feosoosofa’i.

1. Ta’u mai ni soa se tolu
o le *faatau* i le Igilisi:

2. Saili ni fausaga o le
upu *ta’u*

3. Su’e le upu *tauga ma*
tusi sona faamatalaga:



4. Tusi uma upu/
fuiupu e ta’i 4-8
mata’itusi, ma o
latou soa i le Igilisi
(E faitau ai ma upu
ta’ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #27 (TAALOGA I NUMERA)

1	2				6		8	9
			7		9			
	8	9	1			4	5	
		4		6	5		9	7
3		5				2		4
8	9		2	1		3		
	3	1			2	9	7	
			9		8			
9	7		5				4	2

FAIGOFIE / FEOLOOLO / FAIGATA

©sudokuessentials

Fa’atumu
pusa numera
(tama’i
sikuea) i
fuainumera
1 i le 9.
Ia uma ane le
galuega ua
maua atulaina
ta’itasi
(tu, fa’alava)
o iai le 1 i le 9.
E tofu le
atulaina ma
lona
fa’atulagaga
e ese mai le isi.

TALI GALUEGA OLA 27

UILI FAU’UPU 27

1. fa’au—urge; fa’au—
pincer; fa’a’u—look sour;
2. aau & fausaga
ausia, feausi, feausiga,
ausaga
3. faautaga (nauna).
O le mafaia ona fai ni
tonu lelei, tumu i tonu
lelei e fautuaina ai isi.
E fesili le aiga i lo latou
tamāmatua auā o loo ia te
ia le faautaga. Lafo le
mataupu i matai auā ua
matua le faautaga.

4. atua—gods; faauta—
behold; taga—pocket;
taga—permit; auta—drum
sticks; gafa—genealogy;
faga—bay; fagatua—
wrestle; tuaa—ancestors;
utaga—wisdom; foresight

TALI SUDOKU #27

1	6	7	4	5	9	2	3	8
5	2	8	3	1	6	4	7	9
9	4	3	7	8	2	1	5	6
2	9	4	1	3	5	8	6	7
3	5	1	6	7	8	9	2	4
7	8	6	2	9	4	3	1	5
4	3	5	9	6	1	7	8	2
8	1	2	5	4	7	6	9	3
6	7	9	8	2	3	5	4	1

Tofiga Fepulea’i



- Eteuati Ete
- Uncle Sam, Aunty Tala,
- Fusi, Savaii
- musika, ata tifaga

T	A	F	A	O	A	T	A		A	A
T	A		A		O			P		T
L	O	A	L	A	E	F	U	E	F	U
	O	E			O	I	S			K
S	E	M	A	N		U		S	E	L
I		A		O			O	T		K
A	M	I	A		M	A	T	A	G	I
	A		S	U	A		O		A	
A	T	O	A		T	O	F	I	G	A
	U		G	A	O		U	A		
P	U	L	A		U	L	A	P	U	A

TALI PASO # 27

© PasoSamoa.1988

PASO I GAGANA E LUA

Faatumu le paso i upu/igoa Samoa. Fill the
crossword box with **Samoa** words / names
—unless stated otherwise.

1		2		3		4			5	6
								7		
8					9					
				10						
11							12			
						13				
14	15		16		17		18		19	
			20							
21					22					
			23							
24					25					

Faalava~Across

- Auk suburb: always
mispronounced (8)
- air (2)
- when? (4)
- trail of smoke (6)
- smoking (6)
- mail (4)
- bitten (4)
- ringing (6)
- horns (3)
- full (4)
- A Samoan annual
festival (6)
- business not
working (3)
- a kind of crab (4)
- today (6)

6 Bula islands (3,4)

- Church: Samoan for
Passover (6)
- grind (3)
- be abundant (2)
- cut down tree (5)
- wade (noun) (5)
- muscular (5)
- costumes (5)
- work (5)



Gabrielle Faamausili

- O a ni matati’a ua ia ausia?
- O le a sona tala taua’oga?
- O fea ni ona aiga i Samoa?
- O a nisi ana taleni?

POLE MA PAPA





O le OLA o se tautua e fia fai sona
sao i le fa'aaogaina ma le faauualoaina
o le Gagana Samoa ~

Ae mana'omia ona ta'u atu, pasi atu,
momoli atu sana fesoasoani i
potua'oga, aiga, aai, nuu, ma soo se
mea e aogā ai—i soo se itulagi ~

E taua lau fesoasoani.

Faatasi ma isi tausimea a le gagana,
e tasi le faafitiga, ia faaolaola ma
faaaoga pea la tatou gagana, auā
fanau lalovaoa ~

O la ta gagana o lo ta'ua tofi mai le
Atua, e tuufaasolo a tupulaga ~

O le faavae latou te tutū ai ma le
mautinoa, 'ai suiga ma lu'itau a le
taimi.

www.ola888.com

Upu o le Vaiaso: **atalilo**. Na foaina e Aiono Dr Fanaafi Le Tagaloa. Soaina le
'metaphor' o le gagana Peretania, ma lona faauigaga masani ua taliaina ai.

Faupu:

O ni ta'iala e fesoasoani i le faaleoga tonu

FA'ALEOGA O FONIME

fa'aaau

3. *nasela* E maua leo i le 'ea e feula i
fafo e ala i le isu. I lenei
vasega ua iai le *m*, *n*, ma
le *g*. O le *m* e auala i
laugutu ua tapuni ma tatala
fa'atasi ma le 'ea e feula mai
le isu. O le *n* e auala i le pito
o le laulaufaiva e fa'apipii i
tua o vainifo aluga ma toe
fa'amamulu. O le *g* (ng) e
afua mai i le pito i tua o le
gutu pe a pipii le laulaufaiva
ma le aano vaivai ma toe
fa'amamulu.

4. *latera* Ua fa'aigoa ai le fa'aleoga
o le *l*. E maua le leo pe a
fa'apipii a'e le pito o le
laulaufaiva i le peleti po'o
le aano malo pito a luma ma
fa'amamulu. I lenei faiga,
e foliga o lo'o poloka e le
laulaufaiva le ala'ea peita'i
o lo'o sao a'e pea le 'ea i
itu e lua o le laulaufaiva. E
lagona lelei lona fa'aleoga.

5. *o isi leo* E aofia ai le *r*, lea e maua
fo'i pe a poloka le ala'ea e
le laulaufaiva e foliga e folo
i totonu ma fa'amamulu.
Atoa fo'i le *ua* e pei ona iloa
i le konesane *w* i le gagana
Maori. Talu ai e leai se *w*
i mata'itusi Samoa, la lea ua
fa'aaoga le vaueli *u* ma
sona soa e fa'aleotonu ai
(*u* + *o* = *uo*, *ua* + *ti* = *uati*).

